



SAOPĆENJE ZA JAVNOST

Akcija Bjegunac **Određen pritvor trojici osumnjičenih**

Postupivši po prijedlogu Tužilaštva Brčko distrikta BiH, Osnovni sud u Brčkom odredio je pritvor trojici osumnjičenih za neovlašteni promet opojnih droga, koji su prije nekoliko dana uhapšeni u operativnoj akciji *Bjegunac*. Osumnjičenima M. B-M. (49)* i A. B.1 (54)* jednomjesečni pritvor određen je zbog opasnosti da će ponoviti krivično djelo, dok je prema Z. M. (55)* pritvor od 15 dana određen zbog bojazni da će uticajem na svjedoke i saučesnike ometati krivični postupak.

Protiv navedene grupe, Tužilaštvo i Policija Distrikta, u saradnji s Državnom agencijom za istrage i zaštitu (SIPA), duže vrijeme intenzivno sprovode istražne aktivnosti koje su nastavljene prije tri dana izvođenjem operativne akcije kodnog naziva *Bjegunac*, kada je lišen slobode veći broj osoba. Zbog opasnosti da će ponoviti krivično djelo za koje se može izreći kazna zatvora tri godine ili teža kazna i bojazni da će uticajem na svjedoke i saučesnike ometati krivični postupak, Tužilaštvo je nakon ispitivanja osumnjičenih predložilo Osnovnom sudu Distrikta da prema njih četvoro odredi pritvor. Pritvor je najprije predložen prema M. B-M, koji je osumnjičen da se od juna do 22. novembra na području distrikta Brčko sa Z. M, A. B.1, A. B.2, R. Š. i G. L. bavio neovlaštenom prodajom opojnih droga kokain i marihuana. Sumnja se su M. B-M. i Z.M. nabavljali drogu, skladištili je u prostorijama A. B.1, a zatim je lično ili posredstvom ostalih osumnjičenih stavljali u nedozvoljen promet – navedeno je u prijedlogu za određivanje pritvora kojim su uz M. B-M. bili obuhvaćeni još i Z. M, A. B.1 i A. B.2. Odlukom na koju imaju pravo žalbe, Osnovni sud odredio je prema M. B-M. i A. B.1 jednomjesečni pritvor zbog opasnosti da će ponoviti krivično djelo, dok je prema Z. M. pritvor od 15 dana određen zbog bojazni da će uticajem na svjedoke i saučesnike ometati krivični postupak. S druge strane, u odnosu na osumnjičenu A. B.2 sud je odbio tužilački prijedlog za određivanje pritvora naredivši da se odmah pusti na slobodu.

U međuvremenu, Tužilaštvo i Policija nastavljaju istragu protiv šestoro osumnjičenih za krivično djelo neovlaštene proizvodnje i stavljanja u promet opojnih droga (*iz člana 232 Krivičnog zakona Brčko distrikta BiH*), a protiv A. B.1 i za krivično djelo Nedozvoljeno držanje oružja ili eksplozivnih materija (*iz člana 365 Krivičnog zakona*).

*Preduzimanje radnji krivičnog gonjenja prema određenoj osobi ne znači da je ta osoba zaista i odgovorna za počinjenje krivičnog djela. Prema principu presumpcije nevinosti, svako se smatra nevinim za krivično djelo dok se pravosnažnom presudom ne utvrdi njegova krivica.